



Jika projek pembinaan infrastruktur yang dibiayai terbitan itu tidak dibatalkan

Malaysia kuasai 70% pasaran sukuk global

Oleh NABILA YASMIN RAZIB
ekoran@utusan.com.my

■ KUALA LUMPUR 5 JUN

MALAYSIA mampu menguasai sehingga 70 peratus pasaran terbitan sukuk global yang dianggarkan bernilai antara AS\$45 bilion hingga AS\$50 bilion (RM178.6 bilion hingga RM198.6 bilion) jika projek pembinaan infrastruktur yang dibiayai oleh terbitan sukuk tidak dibatalkan.

Ketua Pegawai Eksekutif Kumpulan Perbankan Islam CIMB Group, Rafe Haneef berkata, memandang beberapa projek mega telah diumumkan pembatalannya oleh kerajaan Pakatan Harapan, penguasaan sukuk global Malaysia diunjur berada pada kadar 50 peratus.

Namun begitu ujarnya, Malaysia masih mampu mengekalkan momentum pertumbuhan pasa-



RAFE HANEEF (dua dari kiri) bersalaman dengan Raymond Lew sambil disaksikan Gary Yong (kiri) dan Fikri Mohamad Rawi dalam majlis Pelancaran Takaful Mulia di Kuala Lumpur, semalam. - UTUSAN/SHAFUDIN MOHD NOR

ran sukuk global.

"Tahun lalu menyaksikan Malaysia menguasai lebih 50 peratus daripada saiz pasaran terbitan sukuk global hasil daripada be-

berapa projek infrastruktur yang dibiayai oleh sukuk.

"Tahun ini saya fikir momentum itu akan diteruskan biarpun terdapat beberapa projek yang di-

tangguh dan dibatalkan tetapi sudah tentu sesuatu pembangunan infrastruktur akan tetap diteruskan apabila keadaan kembali stabil," katanya dalam sidang akhbar selepas majlis Pelancaran Takaful Mulia di sini hari ini.

Yang turut hadir, Ketua Pegawai Eksekutif Sun Life Malaysia Takaful, Muhammad Fikri Mohamad Rawi; Ketua Pegawai Eksekutif dan Presiden Sun Life Malaysia, Raymond Lew dan Ketua Serantau Pengurusan Kekayaan CIMB Bank Bhd., Gary Yong.

Tambah Rafe, beliau turut positif Malaysia mampu mengekalkan 50 peratus penguasaan pasaran sukuk global untuk tahun 2018.

"Jika projek-projek mega itu diteruskan Malaysia mampu mencapai sehingga 60 hingga 70 peratus penguasaan pasaran sukuk global," katanya.

Sementara itu dalam majlis yang sama CIMB Islamic Bank

Bhd. (CIMB Islamic), mengunjurkan pendapatan premium melebihi RM10 juta bagi tahun 2018 daripada produk Takaful Mulia yang dilancarkan hari ini.

Yong berkata, sejak polisi baharu itu di perkenalkan pada majlis prapelanjarannya tahun lalu, CIMB Islamic telah merekodkan premium bernilai RM3 juta sehingga 31 Disember 2017.

"Kami yakin dapat mencapai sasaran premium 2018 bersandarkan kepada manfaat perlindungan dan ciri-ciri baharu produk yang ditawarkan," katanya.

Takaful Mulia merupakan polisi takaful pertama di pasaran yang direka khas untuk pelanggan muslim.

Selain menawarkan manfaat perlindungan untuk kematian atau kehilangan upaya kekal, Takaful Mulia turut menawarkan simpanan dan manfaat berkaitan Islam seperti zakat, wakaf, fidyah, sedekah serta haji dan umrah.